

أوعاك نخاف

الفجر خبي ضلمته وفك الحصار

حتى الطيور كان نفسها تطير ف المطر

والليل رغم غربته حزن النهار

والخوف غادر وحدته

مبقاش بيسكن أي دار

حتى الدموع اتجمعت وسط الوجع

نزلت عشان تروي العطش

يا حد محتاج الكون معاه

إوعاك تخاف

أصل الوشوش ليها اتجاه

احضن همومك كلها

وافرد ف خوفك ع الكتاف

ف اللحظة دي يمكن تشوف

كل اللي كاره صرختك

وقف انتباه

لملم ف جرحك وافرده

زي الجناح

امحي بواقى الذكريات

احمي صمودك ف البراح

خليك زي مركبه وفارده الشراع

والموج بيضحك تحتها

ويا الحياة

خلي الشموع تعدي بيك

من ألف ضلمة وألف باب

او عاك تخاف

ابني ف قصور الملحمة

اعزف علي ناي الصمود

ارسم خطاوي الانتصار

فمهما كان الليل طويل

ينام ويحلم بالنهار

فبلاش تكون يا دوب عدد

وارسم خطاوي سكتك

من فرحتك

وصلني دايمًا للإله

تلقي المدد

و أوعاك تخاف